

Poetry Series

Kalimo Abednigo Pitso
- poems -

Publication Date:
2017

Publisher:
Poemhunter.com - The World's Poetry Archive

Kalimo Abednigo Pitso(03/03/1984)

Ke hlahetse motsaneng o monyeyane oa Thoteng ea Moli motse moholo Maseru Lesotho, Batsoali ba ka ke mofu Masilo 'me oa ka ea ntseng a phela ke 'Maneo lakatsa ho leboha mesuoe hlooho ea sekolo sa heso sa Machekoaneng Primary School ka ho nketsa lebala 'm'e Mpho Nau, Mabahlakoana Sehlooho, 'Mabalaisane Mohapi le ba bang boetse ke leboha moholoane oa ka ea seng a sa phele e leng Neo Pitso, khaitseli ea ka Ntahli Pitso le moena ua ka Ts'epo Pitso ka ts'ehetso ea tloha bongoaeng ke rata ho ngola haholo hape ke rata le ho bala. Hona joale ke lula makhoeng lefats'eng la Germiston naheng ea South Africa. Lebitso la buka ea ka ke

LERUMO LA KABELOA MANONG

Mona ke loana ntoea ea leleme

Athe 'na Ke Ua Mag?

KE 'na ngoana letla lepepilo
Ngoana ua ho hloka ntatae
Ngoana ua ho hloka labo Lesika
Lebaka ke hobane ke Moramang.

Ha ke bua ke hamela letanteng
Athe 'na ke ua mang bana'beso
Bo rangoane le bo malome ba 'nyemotsaka feela
Ke fetohile sekhaupane ua sebele
Lebaka ke hobane ke Moramang.

Le lokong ha ke hlahelle
Mafung ha ke ts'ele le mobu
Baholoane le likhaitsetli ba nloants'a ka mantsoe
Ntate a nketsetsa sehl'oho ka bitsoa Mohanuoa
Lebaka ke hobane ke Moramang.

Athe 'na ke ua mang nthoana batho?
Mothoa sekoalloa ka ntle ho mokhoro
Lebitso lebe ke seromo ngoana batho
Kajeno bohle baa tseba!
Hore 'na ke 'na Moramang.

Athe 'na ke ua mang lichabeng
Marena haa 'nehe toka khotla
Maqheku a 'nyemotsaka ka paka tsa matlo
Balisana ba nfetotse ntetekeng nku ea balimo
Ho bohloko ho lahloa ke ntate.

Athe 'na ke ua mang 'm'e?
Ke ntja selahloa le boea
'M'e bua 'nete ke khaotsoe ho bitsoa Moramang
Ekaba ntate u kae 'm'e
Athe 'na ke ua mang nthoana batho?

Kalimo Abednigo Pitso

Fonofono

EA LLA NTHO EA MAKHOA KA TS'OHA
EA LLA EA NTHONKHA MAQEBA A FOLILE
EA LLA EA MPOLELLA TSE BOHLOKO
KE FONOFONO NTHO EA MAKHOOA.

KE TSIBISOA KA LEFU LA MOHOLOANE NEO
MOHOLOANE U SE A ILE BOEA BATHO
U SE A TLA BEHOA KA MOQEBELO
PELO EA UBA-UBA LE HO BALA-BALA.

TSEO TSOHKE KE LI UTLOA KE LE GAUTENG
FONOFONO NTHO ENA EA MAKHOOA
HA ENA MAKUNUTU NTHO ENA
E O TSIBISA TSE BOHLOKO LE TSE MONATE.

E LELEME LE MONATE NTHO ENA
E KEKOLILO LE MONATE NTHOA MAKHOOA
EMPA MOLAETSA OA EONA O BOHLOKO
A LI E TSA KA MEFUTA-FUTA MAKHOOA.

FONO E JOALO NGOANESO
E TLISA TSE BOHLOKO LE TSE MATHEMALOLI
E THABISA LE HO NYOTOBETSA PELO EA MOTHO
'NA FONOFONO KEA E NENA.

A QAPILE MAKHOOA
FONOFONO 'MAKA LITABA
E SE E QABANTSE MONNA LE MOSALI
OEE! E LELEME NTHO ENA.

A QAPILE MAKHOOA
A QAPILE NTHO E RAHILOENG SEFUBENG SA TONKI
NTHO E QHALANG KHOTSO NTLE HO MABAKA
E BOELE E BOPE KHOTSO.

FONOFONO KE MAHLOPHA A SENYA NGOANA NTATE
E SE E NQABANTSE LE MOSALI
KAJENO KE HLOKA MOSALI KA BAKA LA NTHO ENA
FONOFONO E QALILE LA KA LELAPA.

HA E LE MAKUNUTU FONOFONO HA E NA OONA
HO THOE TS'EPO O SE A NYETSE
TSEO TSOHKE KE LI UTLOA KE LE GAUTENG
KA BOSOSELA KA HLABA NQEKE KE THABO

Kalimo Abednigo Pitso

Hobaneng Bana Ba Thari E Nts'o

Hobaneng bana ba thari e nts'o
ekaba bothata bo kae bana beso
E kaba re le sitetsoe kang bana ba ntate?

Hobaneng le re hlekefetsa banna
Ekaba re le entseng bana ba batho
Hobaneng le re bolaea le se na mohau?

Sehlooho se tjena le se nka hokae
Re tla sireletsoa ke bo mang ha le re bolaea
Na ha le re bone hore le rona re batho?

Selemo se ke se joang banna
Le re bolaea larita ra fela
Re fella makobotelong

Behang melamu fats'e banna
Tlhekefetso ka motabo rea e 'nena
Re batla tokoloho le rona re phele

Hobaneng le re bolaea bo-ntate
Hobaneng le re etsa mokoko o itsoalla sethole
Re tla le bitsa bo-ntate joang le re hlekefetsa

Sello sa rona ha se le hlomole ke eng bontate
Hobaneng le le khopo ho feta liphoofolo
Lipelo tsa batho li kae bo-ntate?

Banna tlohelang ho re hlekefetsa rea le kopa
Rona basali re batho joaloka lona
Re batla ho phela re thabele tokoloho

Bontate re tloheleng re tsamaee ka bolokolohi
Khaotsang ho re koetela le rona re batho
Re se re bile re le ts'aba bontate

Selemo sa 2017 selemo sa mahlonoko
Ra shoa larita ra fela nthoana batho
Motho e mots'ehali ke sekhobo banneng

Re fetohilemutla lintjeng
Re matha la Nts'oeke ha re bona banna
Lena lefatse o le ts'abe ngoana lichabeng

Hobaneng bana ba thari e nts'o
Re tla lla ho fihlela neng banna
Ho lekane banna tlohelang ho re bolaea

Kalimo Abednigo Pitso

Hoja Ke Ne Ke Le Kheleke

HOJA KE NE KE LE KHELEKE
KE NE KE TLA BINA PINA E MONATE
PINA E MONATE EA MAEBANA KHOROANA
KE KE KE TLA HOELETSA SA TSOERE LEHLAKENG.

HOJA KE NE KE LE KHELEKE
KE NE KE TLA BINA PINA E MONATE EA MOLUOANE
KE NE KE TLA ROKA LITHABA LE LITHABANA TSA HESO
KE TH'ENTHETSE LEROLE.

HOJA KE NE KE KE KHELEKE
KE NE KE TLA HOELETSA JOALOKA LEKHOABA
KE NE KE TLA ROKA MESUOE LE MESUOETSANA EA HESO
KE ALE LELEME JOALOKA PHATE.

HA E LE BOTLAILA KE BO TSOALETSOE
BOPELE-PELE BOA NTENA
KE SITOA HO KHABA KA BOKHEKEKE
LELEME LE HANA HO LUMELA PINA

HOJA KE NE KE LE KHELEKE
KE NE KE TLA ROKA LINOKA LE LINOKANA TSA HESO
MOLOMO UA KA O HANA HO LUMELA PINA
BOTLAILA BOA NKHOKA

Kalimo Abednigo Pitso

Lengolo Le Eang Sekolong Sa Heso(Machekoaneng)

BOTLE BA HAO BOA MAKATSA MOLEKANE
BOTLE BA SEKOLO SA HESO BOA TSOTEHA
KAJENO O NTSITSE LIKAKAPA BARUTEHI
MAOBANE O NTSITSE MATONA A NAHA
KAJENO KE MESUOE LE MESUOETSANA.

HA KE HOPOLA SEKOLO SA HESO KEABSARELOA
MOEA O SOLLA SEBAKENG KE TLHOLOHELO
O SITO A HO LULA BOKAHARENG BA KA
HA NKA LEBALA TSA SEKOLO SA HESO NKA KULA
TSONA TSA MEHLA E QOLUMETSENG.

NKA PONA JOALOKA PALESA
KA KOPA LEFATS'E LE NGAMOHE KE KENE
KE TLA BINA LIHALELUEA RE BAFITI LEFATS'ENG
NKA U HOPOTSA TSA SEKOLO SA HESO UA SARELOA
UA SARELOA KE TSE BOHLOKO U THABISOE KE TSE MONATE.

KE HOPOLA SELEMO E LE SA 1995
E LE KOLIA-MALLA PAKA MAHLOMOLA SEKOLONG SA HESO
NALELI E KHOLO EA OA
MOHALE A OA HO SE NA THAROLLO
MOFEREFERE OA QALEHA SEKOLONG SA HESO.

LIPELO TSA BANA BA SEKOLO TSA FARASA
LILLO TSA UTLOAHALA LITHABENG
LINONYANA TSA LLA SE BOHLOKO SEBOKO
LINOKA LE LIKPNOKANA TSA CHA
HO ORUHILE E MOHOLO MOSUOE.

KAJENO NGOANA UA MORENENG U ROBETSE
'M'E RAHABA MPO O RE THOBETSE
EA E-BA LILLO LE LITSIKITLANYO SEKOLONG SA HESO
EMPA U SEILE LA HAO LENGOLO MOTSOALI
RE ANYA KHATSELA LEBESE LA SE NONT'S'A NAMANE HO LONA.

KAJENO PELO EA KA E BOHLOKO
KE HOPOLA MESUOE EA KA E ROBETSE
LE HONA E ROBALLA RURI

JOOO, NTATE KHOTSO KHOMOHAKA, MOKONE PITIKOE
LE BA BANG BA LIKAKA BA ITHOBALETSE
RE TLA SALA LE MANG HA KE ILE MESUOE.

HA NKA LEBALA MESUOE EA KA NKA SHOA
'M'E MPHONG NAU, U KILE UA KENYA LETSOHO THUTONG EA RONA
U KILE UA BETLA LINALELI HO SA LE HOBE
U MPHONG E KHOLO HO RONA BANA BA HAO
U PHELETSE LA HAO LEBITSO MOTSOALI.

'NA PELO EA KA E HLORELA MESUOE EA KA
KAJENO LETSATSISI KE LA KHOPOTSO
'METLA KHOLA O HOPOLA MESUOE EA HAE
NGOANA KE FETOHILE SEIPONE SA SEKOLO SA HESO
KE THABILE KA LEBAKA LA MESUOE EA KA.

NKA LEBALA MOTLATSI UA MOSUOE HLOOHO JOANG
KAJENO KE BONA LEHLOKOANA LA TSELA HO 'M'E 'MABAHLAKOANA SEHLOHO
LIKELETSE TSA HAO LIA MAKATSA MOTSOALI U MPHILE THUTO KAJENO KE
MONNA.

KAJENO KE ROMELA LENGOLO SEKOLONG SA HESO
KE TLOTLA MESUOE EAKA KA LENGOLO
THUTO E LOILE BANENG BA LONA MESUOE
KE LE HOPOLA KE LE LEFATS'ENG LA NYAKALLO
HO 'M'E MABALOISANE, U E LOISITSE THUTO
RE KHABA KA THUTO LEFATS'ENG LA MANDELA.

NGOANA KE FETOHILE MOHALALITOE LEFATS'ENG LA BALICHABA
KE ROLELA MESUOE EA KA KHAEBANA
KE BA APESA LIPURUMPERA LIPHAHLO TSA BARUTEHI
LE SUILE MAKOKO HAA ESO OME
KE IKHANTS'A KA LONA BATSOALI.

MOTHO U MOTLE HAA BOLELOA KE BATHO
KAJENO KE LE RORISA LE SA PHELA
HO E-SO FIHLI MESO EA LITS'EHO
LILLO LE LITSIKITLANO TSA MENO
LE SE QHANOLLE LIPERE TSA THUTO MESUOE.

KHELEKE KE FELLOA KE MANTSOE A TEBOHO
KE QETOA KE TLHOKOHELO LEFATS'ENG KA TS'OTLEHI

LITHABA LI HANA HO SIRUHA MAKHALO
KE BONE MACHEKOANENG BOTLE BO TSOTEHANG
HONA SEKHUTLONG SA THUTO EA BASOTHO.

KE BOLAOA KE LENYORA KE TLHOLOHELO
MESUOE FANG BANA THUTO BA RUTEHE
KA THUTO BA TSEBE BOKAMOSO
PELO EA KA EA BALA-BALA
LEBAKA KE LENGOLO LE EANG MACHEKOANENG

Kalimo Abednigo Pitso

Makoti(Lindiwe)

MAKOTI, PALESA E NTLE TS'OANAHALI!
RE LI NTSITSE LIKHOMO TSA BOHALI
RE LI NTSITSE TS'EHLANA E SE HO RATEHA
NGOANA HAA MOTLE, OA BOHEHA!

HALING BA HAE HO TSOILE MAROLE
HO TSOILE KHOMO TSA LESIKA LITHOLE LE LITHOJANA
HO TSOILE LIKHOMO BO-TLAKA-TS'OANA
LI TSOELA UENA TS'EHLANA.

E FIHLILE KHOMO EA RONA BANNA
KHOMO EA HO KATLOA SENNA
BALISANA, LE SE NA LE LUMA-LUMA
PITSA KE TSEO LI SE NTSE LI HOBA

MOSALI MOHOLO HA SE HO THABA
O POPOMETSE MOSEMENG KE THABO
BA RE LIJO O JA LIMENYE-MENYE
O NONNE E TLABA NYEBE-NYEBE

RANNYEO O NE A SE PHELA LIPHATENG
KAJENO O BOETSE BOCHENG
MAHLEU U SE AA NOA LE KA LITELU
RE BONA KA HO IPHOLLA SELELU!

BANA BA BO NGOETSI KE KHORA
LINDIWE ENOA HA SE LETSOHA-PHORA
SELIBENG U EA KA MALUNGOA-LUNGOANA
BANNA RE TLO JA THAHAMESO

Kalimo Abednigo Pitso

Moratuoa(Lindiwe)

SHOETSOE EA LITHOTA SEKHABISA NAHA
PALESA E NTLE EA NAHA SE APARA LITHOTA
KHAREBE EA MAZULU, KHOSATSANA EA BASIEA
SENTEBALE O MOTLE SA LITS'OMONG KHAREBE
O BOTS'OANA SA TLHAKU EA TEKOANE, SEMOMOTELA.

MORATUOA O MOTLE EKARE U NALELI E TOLOKILE
NGOANA A UBUSA LE LIOELO TSA MARENA
U ROABATSA LIKOANKOETLA KA TH'OKO HO MESAMO
MONNA O QHOELOA KE MANTSOE A SA U NAHANA
KHELEKE KE FELLOA KE MANTSOE KE BOTLE.

KE KHAHLILOE KE THOPE
KE RATILE SETSOA KA MAKHALO
'M'E 'NYALISE LINDIWE KEA MO SHOELA
KE RATILE MOROETSANA OA GERMISTON LICHABENG
BANANA BA LESOTHO BA EA 'NYONYA.

LINDIWE, MORATUOA O KOLISA PELO EA KABELOA-MANONG
MOHALE KE ITOMAKA MALEME KE SA U NAHANA
PELO E MPHETOTSE LETLAILA
LERATO LE NKETSA SEMUMU
MALI A HANA METHAPO A BONA LINDIWE.

KHAREBE EA HO TIISA LELAPA LA TSIENG
O SOTSE SA KHOELI E TOLOKILE 'MESA
O MOTKE SA PHOPHI EA LEBESE MORATUOA
U THEMPELESI LESIKA LA MARENA
U NKETSA LETLAILA LE HOJA KE LE KHELEKE.

LIKHOMO TSA NTATE TSA TSAMAEA
LINDIWE EA E-BA MOHOPE UA METSI LAPENG LA NTATE
MABALA A FIELOA LEIFO LA KUNKELA
LEFITORI LA APAROA KE LINDIWE MORATUOA
MORATUOA, MORATUOA, MORATUOA!

Tsamaea Moholoane(Khopotso Ea Lefu La Moholoane Oa Ka, Neo Pitso,2005

Tsamaea moholoane, tsamaea
Ke neng u kula ngoana ntate
Ke neng re seka meokho ke ho talima
Ha u tsamaea re tla sala le mang?

Tsamaea moholoane, tsamaea
Le ha maobane o bitsitsoe sekulane
Bona lebitla ke lena le u emetse
Ha u tsamaea re tla sala le mang?

Tsamaea moholoane, tsamaea
Maobane re ne re u talimile u haula
Kajeno re epa lebitla ho u epela
Ha u tsamaea re tla sala le mang?

Tsamaea moholoane, tsamaea
Seboko sa hao sea haula ngoana batho
Kajeno u kutsi, itsamaele
Ha u tsamaea re tla sala le mang?

Tsamaea ngoana ntate, tsamaea
Bophelo ke ntoa ha bo hloloe
Lebala bophelo ba maobane ngoana 'm'e
Ha u tsamaea re tla sala le mang?

Maobane re ne re bina makolilo
Kajeno re bina koli-a-malla, ra shoelella
Thabo ea maoba e felile, itsamaele
Ha u tsamaea re tla sala le mang?

Tsamaea ngoana'batho, itsamaele
Ntoa e re hlotse ngoaneso, u iponetse
Kajeno ho utloahetse itsamaele
Mosotho o re fika le uele lapeng leso
Ha u tsamaea u hle u itsamaele

